



O'ZBEKISTON RESPUBLIKASI VAZIRLAR MANKAMASINING QARORI

2022 yil « 24 » iyun

№ 346

Toshkent sh.

Комплексе тадбиркорлик лицензияси (франшизинг) шартномаларини давлат рўйхатидан ўтказиш бўйича давлат хизматини кўрсатишнинг маъмурий регламентини тасдиқлаш тўғрисида

Ўзбекистон Республикасининг Фуқаролик кодексига ҳамда Ўзбекистон Республикаси Президентининг “Аҳолига давлат хизматлари кўрсатишнинг миллий тизимини тубдан ислох қилиш чора-тадбирлари тўғрисида” 2017 йил 12 декабрдаги ПФ–5278-сон Фармонига мувофиқ тадбиркорлик субъектлари фаолияти учун янада қулай шарт-шароитлар яратиш, шунингдек, комплекс тадбиркорлик лицензияси (франшизинг) шартномаларини давлат рўйхатидан ўтказиш тизимини автоматлаштириш ва электрон шаклга ўтказиш мақсадида Вазирлар Маҳкамаси қарор қилади:

1. **2022 йил 1 июлдан бошлаб** комплекс тадбиркорлик лицензияси (франшизинг) шартномаларини давлат хизматлари марказлари ёки Ўзбекистон Республикаси Ягона интерактив давлат хизматлари порталида (кейинги ўринларда – ЯИДХП) давлат рўйхатидан ўтказишнинг соддалаштирилган электрон тартиби жорий этилсин.

2. Қуйидагиларни назарда тутувчи **Комплексе тадбиркорлик лицензияси (франшизинг) шартномаларини давлат рўйхатидан ўтказиш бўйича давлат хизматини кўрсатишнинг маъмурий регламенти** (кейинги ўринларда – Маъмурий регламент) 1-иловага мувофиқ тасдиқлансин:

комплексе тадбиркорлик лицензияси (франшизинг) шартномаларини давлат рўйхатидан ўтказиш учун давлат хизматлари марказларига бевосита ёки Ўзбекистон Республикаси Ягона интерактив давлат хизматлари портали орқали мурожаат қилиш тартиби;

франшизинг тўғрисидаги шартномаларга ўзгартириш ва қўшимчалар киритиш ҳолатлари;

франшизинг тўғрисидаги шартномаларни давлат рўйхатидан ўтказишнинг ягона давлат реестрини юритиш тартиби.

3. Адлия вазирлиги **икки ой** муддатда:

Ахборот технологиялари ва коммуникацияларини ривожлантириш вазирлиги билан биргаликда ушбу қарор билан тасдиқланган Маъмурий регламент бўйича давлат хизматларини ЯИДХП орқали Тадбиркорлик субъектларини давлат рўйхатидан ўтказиш ва ҳисобга қўйишнинг автоматлаштирилган тизими ёрдамида жорий этилишини;

давлат хизматлари марказлари ходимлари иштирокида ушбу қарор билан тасдиқланган Маъмурий регламентни амалда қўллашнинг самарадорлиги ва натижадорлиги даражасини оширишга йўналтирилган ўқув-семинарлар ташкил этилиши ва ўтказилишини таъминласин.

4. Ахборот технологиялари ва коммуникацияларини ривожлантириш вазирлиги Адлия вазирлиги билан биргаликда **бир ой муддатда** ЯИДХПда давлат хизматлари кўрсатилишининг ҳар бир босқичида мурожаатлар кўриб чиқилишини мониторинг қилиб бориш тартибини жорий этсин.

5. Адлия вазирлиги бошқа манфаатдор вазирлик ва идоралар билан биргаликда ўзлари қабул қилган норматив-ҳуқуқий ҳужжатларни **бир ой муддатда** ушбу қарорга мувофиқлаштирсин.

6. Ўзбекистон Республикаси Ҳукуматининг 2-иловага мувофиқ айрим қарорлари ўз кучини йўқотган деб ҳисоблансин.

7. Мазкур қарорнинг бажарилишини назорат қилиш Ўзбекистон Республикаси Бош вазирининг молия-иқтисодиёт ва камбағалликни қисқартириш масалалари бўйича ўринбосари – иқтисодий тараққиёт ва камбағалликни қисқартириш вазири Ж.А. Кўчқоров ҳамда Ўзбекистон Республикаси адлия вазири Р.Қ. Давлетов зиммасига юклансин.

Ўзбекистон Республикасининг
Бош вазири



А. Арипов

Вазирлар Маҳкамасининг
2022 йил “ 24 ” июн даги 346 -сон қарорига
1-илова

Комплекс тадбиркорлик лицензияси (франшизинг) шартномаларини давлат рўйхатидан ўтказиш бўйича давлат хизматини кўрсатишнинг МАЪМУРИЙ РЕГЛАМЕНТИ

1-боб. Умумий қоидалар

1. Ушбу Маъмурий регламент комплекс тадбиркорлик лицензияси (франшизинг) шартномаларини (кейинги ўринларда – Франшизинг шартномаси) давлат рўйхатидан ўтказиш, уларга ўзгартириш ва қўшимчалар киритиш тартибини белгилайди.

2. Франшизинг шартномасини давлат рўйхатидан ўтказиш ҳамда унга ўзгартириш ва қўшимчалар киритиш давлат хизматлари марказлари (кейинги ўринларда – рўйхатдан ўтказувчи орган) томонидан Тадбиркорлик субъектларини давлат рўйхатидан ўтказиш ва ҳисобга қўйишнинг автоматлаштирилган тизими (кейинги ўринларда – Тизим) орқали амалга оширилади.

Ушбу қоидага риоя қилмаслик шартноманинг ҳақиқий ҳисобланмаслигига сабаб бўлади.

3. Ушбу Маъмурий регламентда қуйидаги тушунчалардан фойдаланилади:
ариза берувчи – лицензиат, лицензиар ёки уларнинг вакили;

лицензиар – франшизинг шартномаси бўйича тараф, лицензиатга комплекс мутлақ ҳуқуқларни ҳақ эвазига фойдаланиш учун берувчи комплекс мутлақ ҳуқуқлар (лицензия комплекси)нинг ҳуқуқий эгаси;

лицензиат – франшизинг шартномаси бўйича тараф, лицензиарнинг комплекс мутлақ ҳуқуқларидан тадбиркорлик фаолияти учун ҳуқуқий фойдаланувчи;

франшизинг шартномаси – бир тараф (лицензиар) иккинчи тарафга (лицензиатга) ҳақ эвазига лицензиарнинг фирма номидан ҳамда қўриқланадиган тижорат ахборотидан, шунингдек, шартномада назарда тутилган мутлақ ҳуқуқларга кирувчи бошқа объектлардан (товар белгиси, хизмат кўрсатиш белгиси ва ихтиролар ҳамда бошқалардан) лицензиатнинг тадбиркорлик фаолиятида фойдаланиш ҳуқуқини ўз ичига оладиган мутлақ ҳуқуқлар комплексини (лицензия комплекси) бериш мажбуриятини юклайдиган шартнома;

комплекс тадбиркорлик бўйича қўшимча лицензия шартномаси (кейинги ўринларда – қўшимча лицензия шартномаси) – бу лицензиат томонидан унга берилган лицензия комплексидан ёки унинг қисмидан лицензиар билан келишилган ёхуд франшизинг шартномасида белгиланган шартларда фойдаланиш ҳуқуқини бошқа шахсларга бериш тўғрисидаги шартнома;

франшизинг шартномасига муҳим ўзгартириш ва қўшимчалар киритиш – шартнома предмети, етказиб бериладиган товар (ишлар, хизматлар)нинг миқдори, сифати, тури, нархи, бажариш муддатлари, ҳисоб-китоб тартиби, тарафларнинг реквизитлари, шартнома тузилган сана ва жой, шунингдек, франшизинг шартномаси учун қонунчилик ҳужжатларида белгиланган ёки унга нисбатан тарафлардан бири томонидан берилган ариза бўйича битимга эришилиши керак бўлган бошқа муҳим шартлар бўйича ўзгартириш ва қўшимчалар киритиш.

4. Агар франшизинг шартномасида ташқи савдо операциялари (товарлар, ишлар ва хизматлар экспорти-импорти) назарда тутилган бўлса, у ҳолда бундай операцияларга нисбатан қонунчилик ҳужжатларида белгиланган талабларга ҳам риоя қилиниши керак.

Ўзбекистон Республикаси қонунчилик ҳужжатларида назарда тутилган ҳолларда интеллектуал мулк объектларига нисбатан мутлақ ҳуқуқларни ўз ичига оладиган франшизинг шартномаси (лицензия шартномаси)нинг тегишли қисми Ўзбекистон Республикаси Адлия вазирлигининг Интеллектуал мулк департаментида ҳам рўйхатдан ўтказилиши керак.

Бунда лицензия шартномаси франшизинг шартномасининг ажралмас қисми ҳисобланади. Ушбу талабга риоя қилинмаган тақдирда, агар шартноманинг бошқа шартлари бевосита ўз кучини сақлаб қолиши мумкин бўлса, лицензия шартномасининг тегишли қисми ёхуд франшизинг шартномаси умуман тузилмаган ва ҳақиқий эмас деб ҳисобланади. Агар интеллектуал мулк объекти Ўзбекистон Республикаси ҳудудида рўйхатдан ўтказилмаган бўлса, интеллектуал мулк ҳуқуқини рўйхатдан ўтказиш ва франшизинг шартномаси бўйича бериш тарафларнинг хоҳишига кўра амалга оширилади.

5. Франшизинг шартномаси давлат рўйхатидан ушбу Маъмурий регламентга 1-иловадаги схемага мувофиқ ўтказилади.

2-боб. Франшизинг шартномасини давлат рўйхатидан ўтказиш

6. Ариза берувчи франшизинг шартномасини давлат рўйхатидан ўтказиш учун рўйхатдан ўтказувчи органга ўзи келиб мурожаат этади ёки ЯИДХП орқали Тизимда рўйхатдан ўтади.

Ариза берувчи ўзи келиб мурожаат этган тақдирда, рўйхатдан ўтказувчи орган ходими ариза берувчи номидан, ЯИДХП орқали мурожаат этган тақдирда эса, ариза берувчи мустақил равишда ушбу Маъмурий регламентга 2-иловага мувофиқ шаклдаги сўровномани электрон равишда тўлдиради.

7. Ариза берувчи сўровномани шакллантиришни исталган босқичда тўхтатиш ҳуқуқига эга, бунда тўланган йиғим қайтарилмайди.

8. Сўровнома тўлдирилгандан сўнг ариза берувчи маълумотларнинг тўғрилигини текшириб, сўровномани идентификация қилишнинг замонавий воситалари (электрон рақамли имзо, мобил-ID тизими, электрон имзо, дактилоскопия ва бошқалар) билан тасдиқлайди.

Ариза берувчи томонидан сўровномани электрон рақамли имзо билан тасдиқлаш талаб этилмайди.

9. Ариза берувчи томонидан сўровномага қуйидаги ҳужжатлар электрон шаклда (pdf форматда) илова қилинади:

а) рўйхатдан ўтказишда:

франшизинг шартномаси;

хорижий лицензиар учун – хорижий давлатнинг тегишли давлат реестридан кўчирма ёки унинг ўрнини босувчи тегишли ҳужжатлар;

б) муҳим ўзгартириш ва қўшимчаларни давлат рўйхатидан ўтказишда:

франшизинг шартномасига киритилаётган муҳим ўзгартириш ва қўшимчаларнинг нусхаси;

суд органининг қарори асосида франшизинг шартномасига ўзгартириш ва қўшимчалар киритишда – ушбу ҳужжатнинг нусхаси тақдим этилади.

Бунда мазкур ҳолатларда ариза берувчи ишончнома асосида иш кўрадиган шахс бўлса, кўрсатиб ўтилган шахснинг ваколатини тасдиқлайдиган, белгиланган тартибда тасдиқланган ҳужжатнинг нусхаси ҳам тақдим этилади.

Ариза берувчидан ушбу бандда кўрсатилмаган маълумотларни, шунингдек, бошқа ҳужжатларни тақдим этишни талаб этиш қатъиян тақиқланади.

Тақдим этилган ҳужжатлар давлат тили ёки рус тилига нотариал тартибда таржима қилинган бўлиши талаб этилади.

10. Франшизинг шартномасини давлат рўйхатидан (қайта рўйхатдан) ўтказганлик учун базавий ҳисоблаш миқдорининг учдан бир миқдорида йиғим ундирилади.

ЯИДХП орқали мурожаат қилинганда, рўйхатдан ўтказувчи органга ўзи келиб мурожаат этганда тўланадиган сумманинг 90 фоизи миқдорида йиғим ундирилади.

Йиғим тўланганлиги ахборот-коммуникация тизимлари орқали тасдиқланади.

Давлат рўйхатидан (қайта рўйхатдан) ўтказиш рад этилган тақдирда, тўланган йиғим қайтарилмайди.

11. Йиғим суммаси қуйидаги тартибда тақсимланади:

а) рўйхатдан ўтказувчи органга ўзи келиб мурожаат этганда:

0,5 фоизи – Ахборот-коммуникация технологияларини ривожлантириш жамғармасининг электрон ҳукумат ва рақамли иқтисодиётнинг идоралараро лойиҳаларини молиялаштириш бўйича махсус ҳисобварағига;

қолган маблағлар – Ўзбекистон Республикаси Адлия вазирлигининг Давлат хизматларини ривожлантириш жамғармасининг шахсий ҳисобварағига;

б) ЯИДХП орқали мурожаат этилганда:

11,75 фоизи – Ахборот-коммуникация технологияларини ривожлантириш жамғармасининг Электрон ҳукумат ва рақамли иқтисодиётнинг идоралараро лойиҳаларини молиялаштириш бўйича махсус ҳисобварағига (шу жумладан, 0,5 фоизи йиғим тўланганлиги Ягона биллинг тизими орқали тасдиқлангани учун);

қолган маблағлар – Ўзбекистон Республикаси Адлия вазирлигининг Давлат хизматларини ривожлантириш жамғармасининг шахсий ҳисобварағига ўтказилади.

12. Қуйидаги ҳолларда йиғим тўланмайди:

суд ҳужжати асосида франшизинг шартномасига ўзгартириш ва қўшимчаларни давлат рўйхатидан ўтказишда;

франшизинг шартномаси (муҳим ўзгартиришлар, қўшимчалар)ни давлат рўйхатидан ўтказиш бўйича ҳужжатлар такроран кўриб чиқилганда.

13. Рўйхатдан ўтказувчи орган тақдим этилган ҳужжатларни келиб тушган санадан бошлаб бир иш куни давомида кўриб чиқади ҳамда кўриб чиқиш натижалари бўйича франшизинг шартномасини давлат рўйхатидан (қайта рўйхатдан) ўтказиш ҳақида ёки мазкур Маъмурий регламентнинг 15-бандида белгиланган ҳолатлар мавжуд бўлганда, давлат рўйхатидан (қайта рўйхатдан) ўтказишни рад этиш ҳақида қарор қабул қилади.

14. Агар тақдим қилинган ҳужжатлар мазкур Маъмурий регламент талабларига мувофиқ бўлса, рўйхатдан ўтказувчи орган ходими:

ягона давлат реестрига автоматик тарзда тегишли ёзувлар киритиш йўли билан франшизинг шартномасини давлат рўйхатидан ўтказиш, франшизинг шартномаларига ўзгартириш, қўшимчалар киритади;

франшизинг шартномаси давлат рўйхатидан ўтказилганлиги тўғрисидаги хабарномани Тизим ёрдамида автоматик тарзда Адлия вазирлигининг Интеллектуал мулк департаментига юборади;

мазкур Маъмурий регламентга 3-иловага мувофиқ QR-код (матрик штрихли код) қўйилган франшизинг шартномасини давлат рўйхатидан ўтказиш ҳақидаги гувоҳномани шакллантиради;

франшизинг шартномасини давлат рўйхатидан ўтказиш ҳақидаги гувоҳномани ариза берувчига тақдим қилади (ўзи келиб мурожаат этган тақдирда) ёки ариза берувчининг ЯИДХПдаги шахсий кабинетига юборади.

15. Қуйидагилар франшизинг шартномасини давлат рўйхатидан ўтказишни рад этиш учун асос бўлади:

комплекс мутлақ ҳуқуқларнинг мувофиқ бўлмаган ҳуқуқ эгалари (ҳуқуқдан фойдаланувчилар) томонидан мурожаат қилинганда;

хужжатлар тўлиқ бўлмаган ҳажмда тақдим этилганда ёки қасддан сохта хужжатлар ёки маълумотлар тақдим этилганда;

тақдим этилган хужжатларнинг Ўзбекистон Республикаси қонунчилик хужжатлари талабларига номувофиқлиги;

фаолиятнинг тегишли турини амалга ошириш ҳуқуқини берувчи зарур рухсатномалар (лицензиялар)нинг мавжуд эмаслиги, агар бундай рухсатнома (лицензия) Ўзбекистон Республикасининг қонунчилик хужжатларига мувофиқ талаб этилса.

16. Давлат рўйхатидан ўтказишга тўсқинлик қилувчи ҳолатлар мавжуд бўлганда, рўйхатдан ўтказувчи орган ходими мазкур Маъмурий регламентга 4-иловага мувофиқ франшизинг шартномасини давлат рўйхатидан ўтказишни рад этиш ҳақида қарор қабул қилинганлиги тўғрисидаги хабарномани расмийлаштиради ҳамда уни ариза берувчига тақдим қилади (ўзи келиб мурожаат этган тақдирда) ёки ариза берувчининг ЯИДХПдаги шахсий кабинетига юборади.

17. Франшизинг шартномаси давлат рўйхатидан ўтказиш рад этилган тақдирда, ариза берувчи бу ҳақдаги хабарномани олган вақтдан бошлаб уч ой ичида тегишли камчиликларни бартараф қилган ҳолда йиғимни тўламасдан, қайта мурожаат қилиш ҳуқуқига эга.

Бунда франшизинг шартномаси давлат рўйхатидан мазкур бобда белгиланган тартибда ўтказилади.

Ариза берувчи томонидан ушбу банднинг биринчи хатбошида белгиланган муддатдан кейин берилган сўровномалар янгидан берилган ҳисобланади ҳамда белгиланган тартибда давлат хизмати учун йиғим ундирилади.

3-боб. Яқунловчи қоидалар

18. Ариза берувчи рўйхатдан ўтказувчи органга тақдим этилган маълумотларнинг тўғрилиги, аниқлиги, бузиб кўрсатилганлиги учун жавобгар ҳисобланади.

19. Ушбу Маъмурий регламент талабларининг бузилишида айбдор бўлган шахслар қонунчилик хужжатларида белгиланган тартибда жавоб берадилар.

Комплекс тадбиркорлик лицензияси (франшизинг)
шартномаларини давлат рўйхатидан ўтказиш
бўйича давлат хизматини кўрсатишнинг
маъмурий регламентига
1-илова

**Комплекс тадбиркорлик лицензияси (франшизинг) шартномаларини
давлат рўйхатидан ўтказиш
СХЕМАСИ**

Босқичлар	Субъектлар	Тадбирлар	Бажариш муддатлари
1-босқич	Ариза берувчи (франшизинг шартномаси бўйича лицензиат, лицензиар ёки уларнинг вакиллари)	Комплекс тадбиркорлик лицензияси (франшизинг) шартномаларини давлат рўйхатидан ўтказиш учун рўйхатдан ўтказувчи органга мурожаат қилади ёки Интернет жаҳон ахборот тармоғи орқали ЯИДХПда рўйхатдан ўтади.	Хоҳишига кўра (шартномага асосан фаолият бошлаш олдидан)
2-босқич	Ариза берувчи (франшизинг шартномаси бўйича лицензиат, лицензиар ёки уларнинг вакиллари)	Франшизинг шартномасини давлат рўйхатидан ўтказиш учун базавий ҳисоблаш миқдорининг учдан бир миқдоридан йиғим тўлайди. (ЯИДХП орқали мурожаат этилганда сумманинг 90 фоизи ундирилади)	Мурожаат қилинган вақтда
3-босқич	Рўйхатдан ўтказувчи орган (Давлат хизматлари маркази)	Тақдим қилинган ҳужжатлар мазкур Маъмурий регламент талабларига мувофиқ бўлганда, давлат рўйхатидан (қайта рўйхатдан) ўтказилади. Тақдим қилинган ҳужжатлар мазкур Регламент талабларига номувофиқ бўлганда франшизинг шартномасини давлат рўйхатидан (қайта рўйхатдан) ўтказишни рад қилади, бу ҳақида ариза берувчини хабардор қилади.	Бир иш куни мобайнида
4-босқич	Ариза берувчи (франшизинг шартномаси бўйича лицензиат, лицензиар ёки уларнинг вакиллари)	Франшизинг шартномасини давлат рўйхатидан (қайта рўйхатдан) ўтказиш рад этилган тақдирда, тегишли камчиликларни бартараф қилган ҳолда қайта мурожаат қилади.	Хабарнома олган вақтдан бошлаб уч ой мобайнида
5-босқич	Рўйхатдан ўтказувчи орган (Давлат хизматлари маркази)	Франшизинг шартномаси давлат рўйхатидан ўтказилганлиги ҳақидаги гувоҳномани ариза берувчига тақдим қилади (ўзи келиб мурожаат этган тақдирда) ёки ариза берувчининг ЯИДХПдаги шахсий кабинетига юборади.	Давлат рўйхатидан ўтказиш тўғрисида қарор қабул қилинганидан сўнг реал вақт режимида

Комплекс тадбиркорлик лицензияси (франшизинг)
шартномаларини давлат рўйхатидан ўтказиш
бўйича давлат хизматини кўрсатишнинг
маъмурий регламентига
2-илова

**Комплекс тадбиркорлик лицензияси (франшизинг) шартномаларини
давлат рўйхатидан ўтказиш бўйича
СЎРОВНОМА**

I. Арiza берувчи жисмоний шахс тўғрисида маълумот:	
1. Ф.И.О.:	
2. ЖШШПР:	
II. Арiza берувчи юридик шахс тўғрисида маълумот:	
1. Фирма номи, ташкилий-ҳуқуқий шакли:	
2. СТИР:	
III. Франшизинг шартномаси тўғрисидаги маълумот:	
Сўровномани тўлдириш сабаби:	янги рўйхатдан ўтиш; муҳим ўзгартириш ва қўшимчаларни давлат рўйхатидан ўтказиш.
3. Лицензиарнинг интеллектуал мулкка оид лицензиатга бериладиган: интеллектуал мулк объекти давлат рўйхатидан ўтказилганлиги ёки давлат рўйхатидан ўтказиш учун талабнома берилганлиги тўғрисидаги; интеллектуал мулк объекти эгаси тўғрисидаги; интеллектуал мулк объектнинг давлат рўйхатидан ўтказилганлиги тўғрисидаги муҳофаза ҳужжати ҳақидаги маълумотлар.	
4. Франшизинг шартномасини амалга ошириш учун зарур бўлган бошқа маълумотлар:	
5. Электрон почта манзили, веб-сайти манзили (агар мавжуд бўлса):	
IV. Илова қилинадиган ҳужжатлар:	
а) Рўйхатдан ўтказишда: франшизинг шартномаси; хорижий лицензиар учун – хорижий давлатнинг тегишли давлат реестридан кўчирма ёки унинг ўрнини босувчи тегишли ҳужжатлар; ишончнома (заруратга кўра).	
б) Муҳим ўзгартириш ва қўшимчаларни давлат рўйхатидан ўтказишда: франшизинг шартномасига киритилаётган муҳим ўзгартириш ва қўшимчаларнинг нусхаси; суд органининг қарори асосида франшизинг шартномасига ўзгартириш ва қўшимчалар киритишда – ушбу ҳужжатнинг нусхаси; ишончнома (заруратга кўра).	

Комплексе тadbirkorлик лицензияси (франшизинг)
шартномаларини давлат рўйхатидан ўтказиш
бўйича давлат хизматини кўрсатишнинг
маъмурий регламентига
3-илова

Elektron hujjatning
identifikatsiya raqami



**Комплексе тadbirkorлик litsenziyasi (franshizing) shartnomasi
davlat ro'yxatidan o'tkazilganligi to'g'risida
GUVOHNOMA**

Ro'yxatdan o'tkazilgan sana
Komplekse тadbirkorлик litsenziyasi (franshizing)
shartnomasining amal qilish muddati

Litsenziatning nomi _____

Pochta manzili _____

Tashkiliy-huquqiy shakli _____

KTUT kodi: _____

STIR: _____

IFUT kodi _____

Litsenziarning nomi _____

Pochta manzili _____

Tashkiliy-huquqiy shakli _____

KTUT kodi: _____

STIR: _____

IFUT kodi _____

Franshiza obykti: _____

QR-kod

Guvohnomani bergan ro'yxatdan o'tkazuvchi organ nomi:

Комплекс тадбиркорлик лицензияси (франшизинг)
шартномаларини давлат рўйхатидан ўтказиш
бўйича давлат хизматини кўрсатишнинг
маъмурий регламентига
4-илова

Elektron hujjatning
identifikatsiya raqami



_____ qonun hujjatlarida belgilangan tartibda
(ro'yxatdan o'tkazuvchi organning nomi)
va muddatlarda Sizning 20____-yil "_____"
(yil, kun, oy) dagi _____-son so'rovnangizni
ko'rib chiqib, _____ rad etilganligini ma'lum qiladi.
(davlat ro'yxatidan o'tkazish; qayta ro'yxatdan o'tkazish)

Rad etish asoslari:

1. _____
2. _____
3. _____

Axborot tariqasida ma'lum qilinadiki, franshizing shartnomasini davlat ro'yxatidan o'tkazish rad etilgan taqdirda, ariza beruvchi bu haqidagi xabarnomani olgan vaqtdan boshlab 5 ish kuni ichida tegishli kamchiliklarni bartaraf qilgan holda yig'imni to'lamasdan qayta murojaat qilish huquqiga ega

Ariza beruvchi tomonidan belgilangan muddatdan keyin berilgan so'rovnomalar yangidan berilgan hisoblanadi.

QR-kod

Вазирлар Маҳкамасининг
2022 йил “ 24 ” _____ ИЮН даги 346 -сон қарорига
2-илова

**Ўзбекистон Республикаси Ҳукуматининг ўз кучини йўқотган
деб ҳисобланаётган айрим қарорлари
РЎЙХАТИ**

1. Вазирлар Маҳкамасининг “Комплекс тадбиркорлик лицензияси (франшизинг) шартномаларини давлат рўйхатидан ўтказиш тартиби тўғрисидаги низомни тасдиқлаш ҳақида” 2010 йил 4 ноябрдаги 244-сон қарори.
2. Вазирлар Маҳкамасининг “Ўзбекистон Республикаси Ҳукуматининг айрим қарорларига ўзгартиришлар киритиш тўғрисида” 2011 йил 6 сентябрдаги 248-сон қарорига илованинг 16-банди.
3. Вазирлар Маҳкамасининг “Тадбиркорлик субъектларига давлат хизматлари кўрсатиш тартибини янада такомиллаштириш чора-тадбирлари тўғрисида” 2014 йил 31 декабрдаги 377-сон қарорига илованинг 33-банди.
4. Вазирлар Маҳкамасининг “Ўзбекистон Республикаси Ҳукуматининг айрим қарорларига ўзгартириш ва қўшимчалар киритиш тўғрисида” 2017 йил 21 августдаги 651-сон қарорига илованинг 13-банди.
5. Вазирлар Маҳкамасининг “Ўзбекистон Республикаси Ҳукуматининг айрим қарорларига ўзгартириш ва қўшимчалар киритиш тўғрисида” 2017 йил 20 декабрдаги 1001-сон қарорига илованинг 28-банди.
6. Вазирлар Маҳкамасининг “Ўзбекистон Республикаси Ҳукуматининг айрим қарорларига ўзгартириш ва қўшимчалар киритиш тўғрисида” 2019 йил 10 августдаги 661-сон қарорига илованинг 18-банди.
7. Вазирлар Маҳкамасининг “Ўзбекистон Республикаси Ҳукуматининг айрим қарорларига ўзгартиришлар киритиш тўғрисида” 2019 йил 28 декабрдаги 1046-сон қарорига илованинг 99-банди.
8. Вазирлар Маҳкамасининг “Инвестиция ва ташқи савдо соҳасида бошқарув тизими тубдан такомиллаштирилиши муносабати билан Ўзбекистон Республикаси Ҳукуматининг айрим қарорларига ўзгартиришлар киритиш, шунингдек, баъзиларини ўз кучини йўқотган деб ҳисоблаш тўғрисида” 2021 йил 25 июндаги 393-сон қарорига 1-илованинг 9-банди.

